

# Fat bun da la radunanza cumünala dals 29 settember 2009

## Protocol da la radunanza cumünala dals 17 settember 2009, acta 4

Preschaintas: 24 personas

Il capo constata cha la radunanza saja gnüda convochada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Cla Rauch e Cla Sarott.

### Tractandas:

#### 1. Protocol da la radunanza cumünala dals 9 lügl 2009, acta 3

L'actuar prelegia il protocol da l'ultima radunanza cumünala. Il protocol vain approvà.

#### 2. Revisiun parziala da la constituziun cumünala (votumaziuns cumünalas a l'urna)

Il capo orientescha a la radunanza chi's voul cun quista revisiun parziala da la constituziun cumünala dar a la populaziun la pussibilità da vuschar in affars cumünals a l'urna. Il Cussagl cumünal es persvas da survgnir tras quai ün maniamaint plü precis da la populaziun causa la plü co probabel bler plü gronda perticipaziun da votants. Ultra da quai s'haja d'adattar la constituziun cumünala in divers puncts a quella chantunala.

Il capo repassa insembel culla radunanza cumünala ils artichels chi han da gnir müdats. Our dal ravuogl da la radunanza vegnan fattas diversas dumondas ed eir propostas. Tanter oter decida la radunanza cumünala sün proposta d'ün votant da müdar pro l'artichel 22 (procedura cumünanza d'urna), cha las radunanzas d'infuormaziun stopchan esser terminadas almain 20 dis e na sco proponü 10 dis, avant la votumaziun dad urna. Andit da discussiun ha dat eir l'artichel 24 chi descriva il möd da tscherner a l'urna.

La radunanza cumünala decida in scrutin avert, sainza cuntravuschs, da far bun ils müdamaints preschantats.

#### 3. Surdatta da las incumbenzas da la pulizia cumünala a la pulizia chantunala

Il capo orientescha a la radunanza cumünala in detagl sur dal contrat e sur da la cunvegna da prestaziun tanter il Cumün da Sent ed il Chantun Grischun a regard l'intent da surdar las incumbenzas pulizialas cumünalas a la pulizia chantunala.

Davo avair dudi ün pèr votums our dal ravuogl da la radunanza cumünala, tanter oter quel cha l'import pauschal da fr. 65'000.-- saja per quella lavur massa ot, decida la radunanza in scrutin avert cun 17 cunter 5 vuschs ed üna retgnientscha, da far bun il contrat preschantà. La collavuraziun cumainza als 1. december 2009.

#### 4. Orientaziun – Tempo 30

Il schef da vias orientescha a la radunanza cumünala sur da la ultimas masüraziuns da sveltezza in cumün. Ils resultats muossan ch'in general saja gnü sbassà la sveltezza in cumün (a Saglina dafatta per 10 km/h). Masüras supplementaras nu s'haja da trar ingünas, uschè cha'l tempo 30 aintra a partir da subit in vigur legala.

#### 5. Varia

##### 1. Promoziun 1. abitaziuns e direcziun 2. abitaziuns

Ün votant dumonda schi exista ün protocol da la 1. radunanza d'orientaziun a regard la promoziun da 1. abitaziuns e direcziun da las 2. abitaziuns.

Il capo orientescha chi exista ün protocol chi gnarà publicità per minchün.

Fin da la radunanza: 22:45

L'actuar:

Constituziun cumünala

Surdatta da las  
incumbenzas da la  
pulizia cumünala a la  
pulizia chantunala

Tempo 30

Varia